

四庫全書

集部

欽定四庫全書

集部  
圭齋文集卷九

詳校官中書臣呂光復

侍讀臣孫球覆勘

總校官進士臣繆琪

校對官中書臣范鏊

謄錄監生臣王增賢

欽定四庫全書

圭齋文集卷九

元 歐陽玄 撰

神道碑

元中書左丞集賢大學士國子祭酒贈正學垂  
憲佐理功臣太傅開府儀同三司上柱國追封  
魏國公謚文正許先生神道碑

洪惟聖元度越千古世祖皇帝以天縱之資得帝王不  
傳之學上接伏羲神農黃帝堯舜不傳之統而為不世

之君若魯齋許先生以純正之學下接周公孔子曾思  
孟軻以來不傳之道而為不世之臣君臣遇合之契堂  
陛都俞之言所以建皇極立民命繼絕學開太平者萬  
世猶一日也猗歟盛哉先生既沒之三十二年為皇慶  
二年仁宗皇帝詔暨宋九儒從祀宣聖廟庭明斯道之  
所自傳矣又二十三年為元統三年今上皇帝勅賜臣  
玄文其神道之碑以賜其子師敬使刻之於是臣玄再  
拜稽首以復明詔曰論世祖之為君則見我元國家之

初當真元會合之氣運故善言先生必以道統為先而後及功業則上可以稱塞聖天子命臣作碑之初意下可以厭服天下後世學者景慕之盛心也臣謹按先生家乘及嘗私淑父師者序而銘之以金泰和九年己巳九月丙寅生於新鄭邑中幼有異質八歲入學從師問讀書欲何為師曰應舉取第耳曰如是而已乎師大奇之謂其識趣非常他日必有大過人者自顧章句儒非其師遂辭去年十餘有道士過見之驚曰骨清神完目

光射人如箭苟非命世大賢即當神超八表人聞富貴  
不足道也稍長嗜學如渴飢而精強絕人世亂家貧無  
從得書聞有善本冒險數百里就而錄之讀之有疑即  
能有所折衷歲壬辰天兵渡河為游騎所得其萬夫長  
酗酒殺人為嬉先生從容曲譬卒卒其恭久乃信其言  
如著龜人賴全活者無算萬夫長南征乃東去隱徂徠  
山遷泰安之館鎮尋遷大名扁其齋曰魯世因號曰魯  
齋先生國家既有河朔遣官分道以試選士中者得占

籍為儒魏人力勸應試既中選留魏三年自挽鹿車載書還河內魏人致僕馬不聽入洛求第果得之自洛適魏聞河內政虐還止蘇門十餘年間雖顛沛流離行不愧影其與人交中剛外和一介取予必揆於義人與之居雖有忤求馴致俱化所至學者翕然歸之察其誠至乃留館下既留誘掖忘倦身教屬屬言教循循於是師道尊嚴親友日至在魏友實默蘇門友姚樞相與論辨探幽析微詣者惛伏凡伊洛性理之書及程子易傳朱

子語孟集註中庸大學或問小學等書言與心會於所  
從游教以進德之基慨然思復三代庠序之法甲寅世  
祖受地秦中聞先生名遣使者徵赴京兆教授先生避  
之魏使者物色偕行廉希憲宣撫陝右傳教令授以京  
兆提學卜居鴈塔之東與同志講井田之制買園為義  
桑會得請還世祖即祚建元中統召先生為家教既至  
謁歸復召至上京入見上問所學以學孔子對留上所  
無幾以疾還燕明年自上京兆數有數對時相王文統



用事而先生及姚樞實默日被顧問默在上前屢斥其學術不正樞以才見嫉蓋實言本出於先生文統亦頗疑之乃奏姚為太子太保外示尊禮內欲擯使疏遠實姚拜命將入謝先生獨毅然辭謂二公曰禮師傅見太子位東西向師傅坐太子乃坐今能遽復此乎否則此禮自我廢也二公懷制闕下辭文統聞斯言遂寢其命改授先生為國子祭酒實為翰林侍講學士姚為大司農先生亟辭以疾久乃予告還內既而上京使狎至應

命至燕病弗能往至元元年自燕復還先是有詔即家  
為校以業來學乃躬耕里中未嘗以詔示人至是召入  
省議事旋踵求去丞相安圖來謁欲留之退謂人曰時  
流欲革行許先生吾見相去千百尋有詔趣赴省遂北  
行見上檀州諭之曰安圖少不更事卿無負所學悉以  
傳之有嘉謀嘉猷語使入告對曰聖人道極高遠學者  
所得有淺深然當罄所知如聖詔其所不知不敢強也  
安圖明敏有操守告以古人格言往還領悟第恐有聞

之者則難行耳自是預大議時至都堂扈行上京咨訪  
日廣宿衛之士見先生入對舉手加額相慶曰是欲澤  
被生民者上疏陳五事曰立國規模曰中書大要曰為  
君難曰農桑學校曰慎徽典禮累數千言讀奏未徹上久  
聽微有倦色先生即斂衽求退上肅然正襟危坐先生  
乃再讀讀訖上嘉納之其餘論諫多削其藁世罕得聞  
有頃辭疾聽五日一詣省賜西域名藥善酒俄許其還  
繼召與太保鎰秉忠左丞相張文謙議朝儀官制多所

詳定阿哈瑪特請建尚書省總六部與中書省角立特用先生為中書右丞先生求面辭不得見者再越數日奏所議事畢自陳曰臣有三宜辭一非舊勲二茂文德三所學迂恐於聖模神筭未能盡合上曰用卿出朕意毋事多讓先生辭不已上命從官掖之起有旨曰出既出及闕還奏曰陛下令臣出省耶上改容曰出殿門耳明日又辭遣近臣哈扎爾孫先諭止之強出視事至上京奏論阿哈瑪特罔上不道事不服因病謝幾務丞相難之

御史中丞博囉為之請上惻然曰召子師可諭使舉代  
對曰用人宜出上意臣下舉代恐開市恩覬覦之漸有  
旨以國人世胄子弟就學遂篤意教事奏門生王梓劉  
季偉韓思永耶律有尚呂端善姚燧高凝白棟蘇郁姚  
燉孫安鎰安中十二人為伴讀被旨咸驛致之以先生  
為集賢大學士兼國子祭酒先生之為教精粗有序張  
弛有宜而必本諸聖賢啟後學之方踰年諸生涵養薰  
陶周旋中禮講貫通適上喜其業成時自程之越三歲

以改葬親喪謁歸屬召赴行在遂請朝辭以行上命諸老議其去留姚樞謂先生出處有關世運宜成其志更命張文謙問所以告歸之意其對如初始元十四年召議改厯法仍拜集賢大學士兼國子祭酒教領太史院事十七年授時厯成以疾屢告上禮貌隆至路朝錫杖內殿賜坐疾劇裕宗在東宮聞之為言於上以驛送還師可以河東按察副使改懷孟路總管以便養皆東宮請也且使宮臣諭曰先生幸醫藥自輔無以道不行為

憂十八年三月戊戌薨於私第之正寢易箚不變年七  
十三是日大雷電風拔木城中無貴賤少長哭於門商  
唁於塗農弔於野天下識與不識聞訃慨嘆四月乙酉  
葬李封村先塋之南既塋四方學者來會為位哭墓而  
去先生真知力行實見允蹈齋居終日肅如神明嘗遇  
迅雷起前泰宇凝定不喪執守其為學也以明體達用  
為主其脩己也以存心養性為要其事君也以責難陳  
善為務其教人也以灑掃應對進退為始精義入神為

終雖時尚杌鑿不少變其規矩也故君召輒往進輒思  
退方世祖急於親賢而先生篤於信已以是終無枉尺  
直尋之意及夫仕不受祿人以為高則喟然嘆曰甚矣  
余之不幸而有是名也仕豈不有食君祿者哉食無忝  
而已伐宋之舉一時名公卿人受攻取之畧先生言惟  
當脩德以致賓服若以力取必戕兩國之生靈以決萬  
一之勝負及宋既平未嘗以失慊世祖亦未嘗以是少  
之臣觀三代而下漢唐君臣未聞以道統係之者當時



儒宗或知足與知仁未足與居也宋濂洛數公克續斯  
道然未嘗有得君者世祖龍潛諸儒請尚其號曰儒教  
大宗師嗚呼漢唐宋創業之主烏得而有是號哉此天  
以道統而屬之世祖也先生出際斯運一時君臣心以  
堯舜為心學以孔孟為學中外如一喁號公魯齋先生  
嗚呼魯者曾子傳道之器歷代佐命之臣雖欲為此號  
豈可得也非天以道統屬之先生乎先生之謀國譬工  
師受命作室既得大木不肯斲而小之是以寧不受工

師之命而必使學焉後臣之道無愧於伊尹寧不預平  
宋之功而必使以德行仁之言無負於孟軻中統至元  
之治上有不世出之君能表章其臣繼述往聖之志下  
有不世出之臣能贊襄其君憲章往聖之心於是我元  
之宏規有非三代以下有家國者之所可及矣及夫元  
貞大德高第弟子彬彬輩出致位卿相為代名臣皇慶  
延祐之設科子師敬叅預大政以通經學古之制一洗  
隋唐以來聲律之陋致海內之士非程朱之書不讀又

豈非其家學之效見諸已試者歟先生平時頗病文籍之繁嘗曰聖人復出必大芟而治之則周衰以來文勝之弊尤將有以正救於其間是豈淺之為知者乎先生諱衡字仲平其先河內人父通避地河南隱德弗耀今贈銀青榮祿大夫大司徒追封魏國公謚惠和妣李氏追封魏國夫人子男四師可師遜師孚追封魏國夫人敬氏子師敬封魏國太夫人賀氏子公於閨門有禮中饋皆賢事公甚敬師可由河東按察副使歷襄陽路總

管贈禮部尚書謚文簡博學敏思工於辭章有文集貼  
後師遜師乎未仕卒師敬由監察御史踐敎中外歷治  
書侍御史吏部尚書中書參知政事國子祭酒太子詹  
事中書左右丞兩為翰林學士承旨知經筵事今由兩  
臺中丞拜御史中丞階光祿大夫明經務誠學尚節紫  
肖父風女三長適于章儒者餘早世孫男六長從憲以  
蔭累遷湖廣行省理問以歸德知府政事次東孫天次  
從宸積官監察御史山南憲僉終河東副使志趣端正惜

未究用次從宜太史院經歷中書省照磨令翰林院國  
史經歷次從宣太保府長史中書右三部照磨官次從  
宗章佩監異珍庫提點孫女五長適廣東宣慰司都元  
帥審居仁次適大禧院管勾覃質次適翰林應奉蕭璘  
次適寧陵簿張構次適阜城尉陳恕曾孫六長崇祖次  
紹祖秘書著作佐郎武進縣尹次書童文童禮童武童  
曾孫女某大德元年贈大司徒謚文正制詞有曰聖學  
方湮惟洙泗之源是泝嘉謀日告非堯舜之道不陳至

大三年加贈太傅追封魏國公制詞有曰天非繼聖學之隆緒則不生命世之大賢國欲與王道以比隆肆命為蒸民之先覺姚文公燧作詞堂記則謂五百年必有王者興其間必有名世者出惟公足以當之蓋太祖皇帝建國丙寅而先生生於己巳上距宋慶元庚申朱子之卒才十年當興王之會續傳道之業必有數存焉世祖嘗稱其論事多與太祖之言合至取祖訓示之玄生晚學陋何以知先生然誦諸儒之說而想望其餘光焉

先生之道統非徒托諸言語文字而已蓋自謹獨之功  
充而至於天德王道之蘊故告世祖治天下之要惟曰  
王道及問其功則曰三十年有成矣是以啟沃之際務  
以堯舜其君堯舜其民為已任由其真積力久至誠交  
孚言雖剴切終無以忤至於其身之進退則凜若萬夫  
之勇何可以利祿誘而威武屈也晚年義精仁熟躬萃  
四時之知道出萬物之表無事而靜則大空晴雲卷舒  
自如遇物而動則雷雨滿盈草木甲拆事至而不疑事

過而無迹四方之人聞之而知敬望之而知畏親之而知愛遠之而知慕求其所以然則惟見其胸中磅礴浩大人欲淨盡天理流行動靜語默何往而非斯道之著形也又嘗切論之先生天資高出固得不傳之妙於聖賢之遺經然純篤似司馬君實剛果似張子厚光霽似周茂叔英邁似邵堯夫窮理致知擇善固執似程叔子朱元晦至於體用兼該表裏洞徹超然自得於不動而敬不言而信之域又有濂洛數君子所未發者宜夫抗



萬鈞之勢而道不危擅四海之名而行無毀近代元豐  
之異論熙寧之紛爭先生處之豈有是哉拜手稽首銘曰  
世降邃古大樸日雕天吏不作治教寂寥帝恫我民眷  
求有德世祖齊聖作其建極臣有許公身任斯道為仁  
肫肫制作慥慥昔公在野世難薦臻精義致用屈蠖之  
信心樂則顏志任則伊朝思夕維天將啟之朋來遠方  
以辯以問會融一貫永釋理順世祖居潛時號儒宗多  
士既歸功德日崇召公起家斯世將泰灼之俊心天地

正大既握乾符尊履五位利見大人乃在九二覃懷之  
居輅車實來屢進亟退求福不回論議上所容德休休  
猷可替否言直以適上曰仲平汝左朕承其悉爾學資  
朕股肱惟誠惟一以結主知惟明惟哲其止也時初問  
伐國對不以兵上達公猷不在宋平官盛既稟公恥素  
餐敬事後食匪為苟難近臣貴胄世荷國寵我淑以道  
國收其用小學功隳大學陵節我教多術循循無越雖  
聖有模載範其驅以步以趨疇敢侮予自古在昔氣化

推移仁人之興惟世盛衰凡今有生就司榮瘁惟道為  
大與天罔墜世祖繼天惟天生賢道統有任民彝賴焉  
有德有言有子有孫皇命作諒貽厥永存

元翰林學士承旨榮祿大夫知制誥兼修國史  
贈江淞等處行中書省平章政事魏國趙文敏  
公神道碑

至元二十三年世祖皇帝遣使求賢江南得趙宋昌陵  
十一世孫孟頫入見奏對稱旨起家為郎由是被遇累

朝敍歷中外仁宗皇帝聖眷優渥擢掌詞垣致位一品  
文宗之世有司舉行贈典進秩辨章馳爵上公仍議節  
惠至正五年春三月令上皇帝以集賢大學士塔爾哈等  
特賜墓道之碑勅翰林學士歐陽玄為文集賢侍講學  
士蘇天爵書丹翰林學士承旨張起巖篆額臣玄奉命  
謹考行狀次第而銘之叙曰公諱孟頫字子昂姓趙氏  
系出秦王德芳五世祖為秀安僖王實生阜陵賜第湖  
州曾祖考師垂故宋定江軍節度使開府儀同三司萬

壽觀使累贈太師追封新興郡王謚忠襄妣莊氏衛國  
大夫人祖考希承故宋贈朝奉大夫直華文閣致仕累  
贈通議大夫妣鄭氏封碩人考與訾故宋正議大夫尚  
書戶部侍郎知臨安府浙西安撫使臨安縣開國子累  
贈銀青光祿大夫妣李氏封碩人及公入仕我元推恩  
三代曾祖考改贈集賢侍講學士中奉大夫護軍追封  
吳興郡公祖考改贈資善大夫太常禮儀院使上護軍  
追封吳興郡公考改贈集賢大學士榮祿大夫柱國追

封魏國公曾祖妣祖妣並吳興郡夫人妣及生母並魏國夫人初太常公蚤世無子鄭夫人選同宗子為之後集賢公本蘭溪房侍兄與詹通判湖州鄭夫人一見奇之遂請以為嗣內降許之初娶李氏續娶丘氏公丘出行蓋集賢公之第七子也生十有一歲集賢卒丘夫人賢能勗其子學公資稟俊邁讀書一目五行俱下弱冠中胄監試調真州司戶叅軍皇元混一後浮沉鄉社間丘夫人嘗語之曰天下既定聖朝必偃武脩文收四方

才士用之汝非多讀書何以自異齊民公聞益加講貫  
每從里中老儒教繼公質正數歲大進尚書夾谷奇之  
以翰林編脩薦不就江南侍御史程公鉅夫出訪江南  
遺逸得二十餘人以應詔公在首選初授奉訓大夫兵  
部郎中轉集賢直學士奉議大夫遷朝列大夫同知濟  
南路總管府事兼管諸軍奧魯以脩世祖實錄召入書  
成謁歸改知汾州未上以集賢直學士行江浙等處儒  
學提舉除揚州路泰州尹進階中順大夫需次於家仁

廟在東宮聞公名召入拜翰林侍讀學士知制誥同脩國史改集賢侍講學士中奉大夫復入翰林為侍講學士知制誥同脩國史俄遷集賢侍讀學士正奉大夫進集賢學士資德大夫拜翰林學士承旨榮祿大夫知制誥兼脩國史延祐六年五月告老還湖州是冬召入朝以疾不果行至元元年上章乞致仕不報二年春遣使存問夏六月辛巳薨於私第至順三年贈榮祿大夫江浙等處行中書省平章政事柱國追封魏國公謚曰文



敏公初見世祖風神散朗容止閒暇上以為有神仙風  
會尚書省立命草詔公援筆立成上聞大旨召近臣譯  
以對喜謂公曰卿言皆朕所欲言者自是國有大議必  
與咨詢一日侍側有詔羣臣議政上顧公曰卿往共議  
至則衆議賊以至元鈔二百貫為滿論死公曰鈔法初  
行以銀為則歲入厥直輕重相去至數十倍今雖改法  
比及虛實政未可知古律以米絹論賊二物民生所須  
謂之二實最為適中况鈔乃宋人所造其初止行遠方

令襲用之以鈔論死恐非良法刑部楊郎中起而作色  
曰朝廷初行至元鈔故以計贓公詆其非欲阻其法乎  
吾意今日議法必集儒臣又豈無一士如公者乎公曰  
人命至重議法失當人將不得其死奉詔與議偶有所  
見不敢不言且中統鈔虛故改至元鈔君謂至元鈔終  
無虛時有是理哉楊為之赧然議罷出謝曰某失在不  
學細思公之言是也洎入夏官會天下驛置凡使客委  
積之費至元十三年以來每歲僅支中統鈔二千錠物

價騰踊使客曰增吏無以自給物倍於民不勝其擾請  
增至二萬錠用乃舒會濟南總管闕公獨判府事聽斷  
明恕訟牒以稀或經月獄空有元掀兒役于鹽官逃之  
他郡其父疑同役者殺之得遺牒之半於澤中以為子  
骸同役不勝榜掠誣服公疑有寃緩其獄掀兒果歸誣  
服者釋城東有上腴田二頃兩家兵後互爭而皆亡其  
券有司不能決公斷以養士夜出邏聞有讀書之聲使  
人私削其柱為識明日饋酒為勞得一能文之士必加

獎異自教以文法郡儒風以盛歲旱禱雨龍洞有雲如  
車蓋隨馬至城中大雨旬餘城東有龍湫自為文責之  
雨洊至歲大熟白直數人者盜米其徒自首吏請加詰  
公卻之曰加詰累人必多及去官有數人送之至京號  
泣不忍去問之即向盜米者盜當墨必自臨視語吏曰  
是中豈無迫於飢寒及詰誤者戒之細書盜間轉相告  
曰趙公仁人也吾徒何忍數犯其在朝廷多所匡正圻  
甸地震北京尤甚死傷數十萬上憂之自灤京還先遣

平章諤爾根薩里馳至都召集賢翰林兩院老臣問故  
密旨勿令丞相僧格知之時僧格遣錫都王濟等理筭  
天下錢糧已徵數百萬未徵猶數千萬名曰理筭其實  
暴斂無藝州縣置獄株逮故家破產十九逃亡入山吏  
發兵蒐捕因相挺拒命兩河間盜有衆數萬公顧諸老  
無敢詆時政者素善諤爾根薩里密謂之曰今理筭苛  
虐民不堪命事變且起地震之由實在於此宜請於上  
援貞觀故事大赦天下蠲除逋負則和氣可回災異可

弭謬爾根薩里入奏如公言上大說從之詔草具會兩院諸老都堂僧格瞠視諸老見公進讀詔草至蠲除一條怒揺手曰此事必不可行汝曹所擬必非上意公徐進曰今理算錢糧其不可徵者皆死亡之數不及今放散免之他日有言中書省累失陷錢糧數千萬者丞相何以自解僧格誅曰吾慮不及是詔書既下兆姓舉手相慶始有蘇息之望上問李尚書葉右丞二人優劣何如對曰夢炎昔與臣父事宋時臣方幼忠佞不能周知

臣與夢炎同事陛下見其為人重厚篤於自信思慮深  
長善斷國事有大臣風若李之所學在臣亦不知亦不  
能言言未既上遽曰卿意豈非謂夢炎優於李也賈似  
道罔上誤國夢炎在中書時無一言李布衣伏闕上書  
乞斬似道是賢於夢炎明矣李論事厲聲色盛氣凌人  
若好已勝者故剛直太過人多怨之今朕得卿之情卿  
父與夢炎同朝不欲斥其非耳可為朕賦詩諷夢炎公  
立進詩曰狀元昔受宋家恩國困臣強不盡言往事已

非那可說且將忠直報皇元上深善卒章之意出見奉  
御薩里於幄殿側告之曰上論賈似道誤國之罪責葉  
夢炎不能言今僧格誤國甚於似道我輩緘默他日何  
以逭此責乎近臣中讀書知道理慷慨有大節上所親  
信無踰公者誠能捐一旦之命為天下除此賊仁人之  
事也薩里曰今災異數見盜賊蜂起皆僧格聚斂所致  
吾所以為日夜切齒腐心者公實啟我以機殆天誘之  
徑造榻前歷數僧格之罪百倍似道不亟誅必亂天下



上初大怒叱衛士批其頰口鼻流血仆地少間復呼而問之對如初既而大臣有助其言上大悟遂按誅僧格後薩里語及斯事歎曰使我有萬世名者子昂之力也平江守趙全不法前守王虎臣訟之詔遣虎臣就問右丞葉李執奏以為不可上不允公曰全在平江為政貪酷固當治虎臣在官亦嘗犯法全嘗持之今虎臣罪幸在赦前故得擯撫全罪若使就訊必挾公濟私別遣官為當上從其言其在館閣尤多裨益因有事南郊他學

士撰祝冊有云章亥復生不足以步皇元之幅員又云  
太祖皇帝正東向之位公曰天子父事天子誇疆理於  
其父可乎不可且公不為禮乎禮大裕太祖東向居中  
子孫在左者南向故稱昭在右者北向故稱穆若南郊  
之位上帝南面太祖自宜西向故事第稱配天作主公  
不用何也其人謝服從所判定皇太后命學士擬改隆  
福宮名同列擬光被公擬光天或曰光天陳後主詩不  
祥公曰帝光天之下出虞書何謂不祥各書所擬以進

後竟用光天以遠臣遭遇累朝特見優禮世祖戒宿衛  
公入內庭毋禁賜坐葉右丞相每見與語或至夜分公  
於天下事當言者無所不及嘗稱公聰明剛正敢為直  
言公聞之益自斂退一日問公曰卿太祖子孫乎太宗  
子孫乎對曰臣太祖子孫上曰趙太祖真英主也其行  
事卿知之乎對曰臣蚤失父故老不以語臣故臣粗知  
其畧耳上曰太祖行事多可法者朕皆知之暇日當以  
語卿又嘗面諭之曰大臣奏事卿可與俱人有過差意

涉欺罔悉為朕言之公謝不對自爾數求補外後聞其  
家貧賜鈔二千五百緡仁廟字公而不名詔近臣曰文  
人世所難得唐李太白宋蘇子瞻姓名至今在人耳目  
朕有子昂與古人何別時有譔述輒傳旨屬筆與侍臣  
論公他臣不能及者數事苗裔一也姿表二也博學三  
也操履純正四也文詞古雅五也書畫絕倫六也旁通  
釋老書七也他日賜鈔五百錠恐中書留難以普度別  
貯賜之慮其畏寒初內府賜銀鼠翻披英廟命公書孝

經亦遣使以上尊酒衣二襲即家賜公公為兵部早入  
官署過東苑牆外道隘馬遇滑即墮牀河水中僧格言  
於上因移牆近裏者二丈許僧格下令曙鐘鳴治事部  
官後至者笞公在遇晚獨得釋自是笞止曹吏公雖忠  
結主知亦致衆忌性簡易疏仇發言切中時病屢在上  
左右上察其無他獲全晚節程鉅夫方薦公有臺中丞  
言趙某故宋宗室不宜薦進使近左右鉅夫奏曰陛下  
盛德立賢無方臺臣以是劾臣將陷臣不測上曰彼豎

子何知顧侍臣傳旨不越今日逐其人出臺仁廟眷公  
方隆不悅公者言公趙太祖子孫上初若不聞已而游  
辭不已乃厲聲視之曰汝言趙子昂趙宋子孫豈謂家  
世不汝若耶始惶慙趨出又言國史不宜使公與聞上  
大怒曰趙子昂乃先朝簡拔以為帷幄臣者朕使討論  
古義典司著作此曹咄咄不懲一二無以戒後言者乃  
息世皇屢欲用公公自知直道不容於人居正路弗便  
往往力辭初授官廷論欲以為吏部侍郎高參議持不

可尚書省罷賀巴延入辭參知政事公適侍立上目公  
進曰卿亟往中書叅決庶政以分朕憂公堅辭不拜上  
問閤復宋勅二人如何對曰相才實難是日京師盛傳  
公已入省暮歸賀客候門者填塞公笑而遣之至元鈔  
法澁滯公與尚書劉伯宣同被命往江南按問行省丞  
相慢令之罪左右司路府官許就答公深以為衣冠之  
辱比還一無所決罰僧格欲加譴責公不為動初受程  
鉅夫薦晚進翰長與程交代必先往拜其門而後入院

公所為務崇廉恥先禮遜縉紳相傳以為厚德平居嗜  
好冲澹家世純綺况味埒布韋貴及崇階不見矜色客  
求文字與之周旋終日雖極勞甚憊未嘗拒人獨人有  
過失必面致諷諫無隱然直而不訐人亦易從病劇將  
終援簡濡毫如常時有頃倏然而逝娶管氏諱道昇字  
仲姬工詞翰善畫治內有才具累封魏國夫人先四年  
薨子男三人亮早夭雍夙慧有父風以蔭歷守昌國海  
寧二州夾舉茂才女六人長適強文寶次適海道運糧



萬戶費雄次適李元孟次適王國器次適劉某孫男二  
人曰鳳曰麟薨之年九月葬德清縣千秋鄉東衡山之  
陽管氏附公治尚書有書註於禮樂度数甚明知音律  
幽眇有琴原樂原各一篇號松雪道人有松雪齋文集  
若干卷談錄一卷為文清約典要諸體詩造次天成不  
為奇崛格律高古不可及尺牘能以數語曲暢事情鑒  
定古器物名書畫望而知之百不失一精篆隸小楷行  
草書惟其意所欲為皆能伯仲古人畫入逸品高者詣

神四方貴游及方外士遠而天竺日本諸外國咸知寶藏公翰墨為貴故世知之淺者好稱公書畫識者論公則其該洽之學經濟之才與夫妙解絕藝自當並附古人人多有之何至相掩也仁廟彙公及管夫人及子雍所書藏中祕書曰使後人知今朝人臣中一家書學有如此者適新太廟成君相欲講禘祫定廟樂求習禮樂者如公已鮮今上脩宋史思士大夫熟宋事者亦何可得哉玄初以禮部奏名召奉大對公為讀卷官擢真前

列及公薨狀公之行乃同年進士寧國路推官楊載距  
二紀立備列北門公有賜誅之命誼不敢辭請系以銘  
曰有白其馬惟周之客周人尚駢客世殷白我元忠厚  
軼彼成周宋有近屬遇之加優侃侃魏公徵自炎方入  
見殿廷美如圭璋昔客在周但聞助祭未聞侍側命以  
獻替維此魏公進為親臣詢厥世系念其前人魏公在  
列玉立陛前上有顧問其言便便羣臣議法命往咨度  
援古例令論政以確法司在坐盛氣見侵理到之告折

服其心上命代言對御操筆宸衷未宣已布尺一上遇  
災變詔問其由公言暴斂時政是尤委曲獻忠請釋逋  
負公進詔草時相震怒相怒未已公言徐徐相莫之沮  
乃下寬書萬方懽呼涵泳聖恩公啟近臣力拔惡根近  
臣感激碎首強諍權奸既摧乃息裨政宣室夜問言不  
及他吏蠹民瘼直言無阿弱弗勝衣食弗盡器臨事論  
建奮無畏避世祖援公俾入政府聞命而僂懇求外補  
仁皇踐祚首召入覲皓首未歸寵冠禁近乃登瀛洲載

頂鼇岫丕煥皇猷黼黻在手琨牒瑤編藏在宗廟屈玉  
垂金分鎮山澤遠方裔夷偶獲簡牘雖未識公想見眉  
目嗟乾之資唯一清氣人稟至清乃精道藝天朗日晶  
一清所為星月明概雲車陸離圖書以陳文字以立韻  
始造書鬼神為泣宇宙精英發決在茲清氣所萃乃臻  
瑰奇允矣魏公玉壺秋水巧出天智智窺神能鳳翽其  
羽止於阿閣朱鴈天馬播之廟樂彌文日增制作日淑  
國於老臣百不一贖皇上稽古訪問舊儒豐碑為賜螭

首龜趺敬告後人毋忘帝力世祖深仁仁皇至德黼嘏  
裸周孰擬我朝詞翰揚休百世孔昭

元故翰林學士中奉大夫知制誥同脩國史貫  
公神道碑

至治三年歲癸亥秋立校藝浙省既竣事出而徜徉湖  
山之閒故人內翰貫公與立周旋者半月餘及將去杭  
薄暮携酒來別謂立曰少年於朋友知契每別輒纏綿  
數日近年讀釋氏書乃知釋子誓有是心謂之記生根

焉吾因以是為戒令於君之別獨不能禁且奈何哉言  
已悽然而別明年甲子夏公捐館於杭數月訃至哭之  
盡哀自是凡至杭遇公舊遊追憶臨別之後未嘗不為  
之愴然出涕呼酒相酹也公薨廿又五年子阿爾斯蘭  
哈雅展省于燕顧公神道未銘願屬筆焉其忍銘乎公  
家世北庭裕實其名酸齋其號也故湖廣行省右丞相  
贈宣威服遠輔德翊運功臣大師開府儀同三司上柱  
國追封江陵王謚武定阿爾哈雅之孫故浙江行省平

章政事贈光祿大夫河南行省平章政事柱國追封楚國公謚忠惠格濟格之子母趙國夫人廉氏故平章政事希閔之女公之初生趙國夜夢神人取天星為明珠以授趙國掌玩而吞之已而有身公生神采迥異年十二三膂力絕人善騎射工馬槊嘗使壯士驅三惡馬疾馳公持稍前立而逆之馬至騰上越而跨之運稍風生觀者辟易挽強射生逐猛獸上下初襲父爵為兩淮萬戶府達魯噶齊鎮永州在軍氣候分明賞罰必信初忠



惠公寬仁麾下玩之公至嚴令行伍肅然軍務整暇雅歌投壺意欲自適不為形勢禁格然其超擢塵外之志夙定於斯時一日呼弟呼圖克哈雅語之曰吾生宦情素薄然祖父之爵不敢不襲今已數年法當讓汝即日以書告于忠惠公署公牘移有司解所綰黃金虎符欣然授之退與文士徜徉佳山水處倡和終日浩然忘歸北從承旨姚文公學公見其古文峭厲有法及歌行古樂府慷慨激烈大奇其才仁宗皇帝在春坊聞其以爵位

讓弟謂其宮臣曰將相家子弟有如是賢者誠不易得  
姚公入侍又數薦之未幾進直解孝經稱旨進為英宗  
潛邸說書秀才宿衛御位下仁宗正位宸極特旨拜翰  
林學士中奉大夫知制誥同脩國史一時館閣之士素  
聞公名為之爭先快覩會國家議行科舉姚公已去國  
與承旨程文憲公侍講元文敏公數人定條格贊助居  
多令著於令未幾公上書條六事一日釋邊戍以脩文  
德二曰教太子以正國本三曰立諫官以輔聖德四曰

表姓氏以旌勲胄五曰定服色以變風俗六曰舉賢才  
以恢至道凡萬餘言往往切中時弊上覽嘉歎未報公  
自籌曰昔賢辭尊居卑今翰苑侍從之職高於所讓軍  
資人將謂我沽美譽而貪美官也是可去矣移疾辭歸  
江南十餘年間歷覽勝概著述滿家所至縉紳之士逢  
掖之子方外奇人從之若雲得其詞翰片言尺牘如獲  
拱壁公曰我志逃名而名隨我是將見害江浙物繁地  
大可以晦迹乃東遊錢塘賣藥市肆詭姓名易冠服混

於居人嘗過梁山灤見漁父織蘆花絮為被愛之以紬  
易被漁父見其貴易賤異其為人佯曰君欲吾被當更  
賦詩公援筆立成竟持被往詩傳人間號蘆花道人公  
至錢塘因以自號入天目山見本中峯禪師劇談大道  
箭鋒相當每夏坐禪色山暑退始入城自是為學日博  
為文日邃詩亦冲澹簡遠書法稍取法古人而變化自  
成一家其論世務精覈平實識者喜公謂將復為世用  
而公之踪跡與世接漸疎日過千擁被堅卧賓客多不

得見僮僕化之以晝為夜道味日濃世味日淡去而遠  
之不翅解帶泰定改元五月八日薨於錢塘寓舍年三  
十有九自士大夫至兒童賤隸莫不悼惜某年月日諸  
孤奉柩塋於析津之祖塋娶石氏北京名家江陵總管  
天麟之女有婦德追封京兆郡夫人子二人長阿爾斯蘭  
哈雅歷蘭溪州達魯噶齊推茶提舉慈利州達魯噶齊  
所至以清白吏著聞次博索哈雅孫四人長南山次寧  
山次葆山皆業進士應舉女一人適懷慶路總管段謙

有學識能文章玄嘗評公武有戡定之策文有經濟之才以武易文職掌帝制固為斯世難得然承平之代世祿之家勢宜有之至如銖視軒冕高蹈物表居之弗疑行之若素泊然以終身此山林之士所難能斯其人品之高豈可淺近量哉有碑銘記叙雜著詩詞若干卷及所進孝經行於世銘曰嗚呼貫公麒麟鳳凰其往不可詰其來不可期者乎嗚呼貫公神龍天馬其變不可測其常不可窺者乎抑宇宙英氣合袪為雲流布為霆感

物神化文武動靜無施而不宜者乎將飛僊應真出入  
機用涉世為戲一旦解悟條然而聚散若然而合離者  
乎死生幽明之際焉知公之所甚樂乃世之所為悲者  
乎嗚呼噫嘻事有可知有不可知所知者燕瑩之藏  
體魄在茲我為銘詩詎能為公之輕重姑以慰公後人  
之思

元故奎章閣侍書學士翰林侍講學士通奉大  
夫虞雍公神道碑

自漢魏六朝以來經生文士判為兩塗唐昌黎韓公宋  
廬陵歐陽公力能一之而故習未盡變也濂洛諸君子  
出其所著作表裏六經言或似之於是文極文之典奧  
道極道之精微一趨於至善而後止其歿也門人錄其  
語以相授受其為書雖出一時之紀聞然概之聖人脩  
辭立誠之旨未盡合也昧者準之以立言世之文士共  
起而病之然文士知病其為文而未必知文外非別有  
道道外非別有文也二者胥失焉宋末病滋甚皇元混



一天下三十餘年虞雍公赫然以文鳴於朝著之間天下之士翕然謂公之文當代之巨擘也而不知公之立言無一不本於道也既而退居山林垂二十載乃得昌言於斯道一志於斯文而遂老矣惜哉易簣之再暮子安民奉狀踵門謁玄銘其麗牲之石玄辭不獲則先發其所深慨而請繼以言焉叙曰公諱集字伯生姓虞氏系出虞仲世家會稽唐永興文懿公世南為唐初名臣子孫始遷雍永興生戶部侍郎昭昭生江陰令陟陟生子

盱眙丞智長城令禮金吾衛長史明傳五世至仁壽太守敦人從僖宗幸蜀子孫為蜀人仁壽九子伯曰賞五子次曰琚琚生庾庾生承承生詢詢生繼繼生崇崇三子季曰昭白宋銀青光祿大夫國子祭酒贈太師周國公五子季曰軒贈太師魏國公三子季曰祺進士及第歷官左中大夫贈太師秦國公生左丞相雍國公允文贈太師謚忠肅三子伯曰公亮早年高尚不仕晚以奉議郎直秘閣贈開府儀同三司仲曰公著知渠州官至

中奉大夫仁壽縣開國男累贈光祿大夫李曰抗孫大理寺丞官至中奉大夫開府六子次曰剛簡是為蒼江先生官至朝請大夫利州路提點刑獄二子伯圭官至奉直大夫歷知永連兩州自永移連道臨川其女弟適邕管安撫陳公元普先寓屬邑崇仁聞其至使人迎之得前郡守江陵項公別第於南門外以居之自是家崇仁皇贈中奉大夫禮部尚書追封雍郡侯妣張氏雍郡夫人無子而從祖渠州有子六人長兵部直寶文閣晉

三子仲子朝請郎通判惠州從龍子汲長而賢乃以為  
後是為井齋先生公之先考也皇贈通奉大夫四川等  
處行中書省叅知政事上護軍追封雍國公妣眉山楊  
氏追封雍郡夫人夫人給事中工部侍郎國子祭酒見  
山先生文仲之子叅知政事平州先生棟之猶子也所  
出三子長即公次槃進士及第卒官嘉魚縣尹次葉叅  
政公初授承直郎黃岡縣尉見山守衡州夫人從叅政  
方需次與偕時未有子見山禱於南嶽已而有娠及將

蓐見山一日晨興出治事時尚蚤公服坐中堂以坐  
久假寐夢一牙兵刺持劍入白南嶽主者來謁起肅之  
而寤聞兒啼聲公生焉故命公小字衡公對客嘗自言  
未昏官時屢夢遊南嶽能言其勝處乙亥見山移守漳  
州叅政伉儷同行丙子宋亡公五齡夙慧避地無書籍  
楊夫人能倍誦論孟及春秋左傳歐蘇文之常誦者口  
授輒成誦九歲還長沙始得墨本而公已悉通大義又  
五年居崇仁故寓已善屬文草廬先生吳公請見其所

作謂叅政公曰賢郎他日當有文名於當世邑庠循舊  
式月出詞賦經義題課士公與嘉魚令以書義試皆中  
前列老儒為之歎服兵後勝國名公卿家多流寓是邦  
公游諸公間備聞前脩格言考覈前代典故舊家世系  
源委言若指掌楊夫人素高吳公伯清之學贊叅政公  
遣二子從之游吳公方著書有所論辨公能推類達意  
吳公每獲助焉大德六年用大臣薦授大都路儒學教  
授平陽王文憲公尹京待以客禮十一年擢國子助教

丁內艱至大二年服闋以舊官復用四年轉將仕郎國  
子博士延祐元年改從仕郎太常博士奉詔西祠岳瀆  
四年遷承事郎集賢脩撰考大都鄉試五年被旨召集  
賢直學士吳公伯清於家尋除翰林待制儒林郎兼國  
史院編脩官丁外艱服闋以舊官召還泰定元年考試  
禮部陞承德郎國子司業三年進奉訓大夫秘書少監  
四年再考試禮部拜翰林直學士奉議大夫知制誥同  
脩國史俄以前職兼經筵官進階奉政大夫明年又兼

國子祭酒天歷三年特授中順大夫未幾拜奎章閣侍書學士陞亞中大夫依前翰林直學士知制誥同脩國史兼經筵官國子祭酒會有令諸兼職不過三辭祭酒得請兩月進階中奉大夫餘如故至順元年御試選讀卷官被旨脩皇朝經世大典為總裁官三年拜翰林侍講學士通奉大夫餘如故今上皇帝入正大統用至大故事召諸老赴上京議事公在召列及還大都以病謁告歸家元統二年遣使賜上尊酒金帛召還朝使者至



郡疾作不能行而歸至正三年勅修遼金宋三史欲用  
公總裁或陳其病狀母苦其遠行奏牘將上而止朝使  
有自江右來者廷中大臣趨詢起居八年五月二十三  
日以疾薨於私第年七十又七大風飄瓦拔屋前後巨  
木數十株治命以深衣斂母用浮屠明年己丑八月二  
十一日乙酉葬邑之長安鄉道德里天寶山西之潭源  
娶浚儀趙氏系出宋秦邸前公四十二年卒累封雍郡  
夫人子安民趙夫人出也蔭奉訓大夫廣州路東莞縣

尹轉奉直大夫惠州路總管府判官陞奉議大夫吉安  
路安福州知州徐氏生男二人維摩努七十女一人俱  
早夭劉氏生男一人憲孫女一人藥藥適譚紱郭氏生  
男二人長延年以廣東帥府奏差授武緣縣博合砦巡  
檢次翁歸業進士馬氏生男一人高門甫弱冠孫男五  
人某蓋嘗論公家世勲績文懿事唐文皇博學洽聞偉  
節謹論忠貶魏徵而始終無疵墓陪昭陵像圖凌烟忠  
肅當令海陵南侵至江以儒者一戰而却之恩陵在江

上歸禪位阜陵金易其國書南北勢始定阜陵遂相之  
功烈不卑矣及公之身遇聖代事九朝鋪張皇猷位列  
法從與文懿忠肅後先七百年照映史冊嗚呼盛哉又  
嘗論公家學禮部公與臨邛魏華甫成都范文敬李微  
之講學蜀東門外為西南道學之倡他日以學為政叅  
蜀制聞自請行邊却敵兵數十萬人守簡州憲夔路立  
保置屯田得流民三十九萬餘以實邊鄙敵不敢犯叅  
政公克振滄江先生之文學吳公稱其為文清醇典教

江右湖南簡拔俊乂如南陽富珠哩卽子輩後多顯融  
號稱知人吳氏學未盛行首與藁城董公表章之使大  
有名於時時楊夫人早得見山先生春秋之旨從父平  
舟先生以道學自任當時夫人未筭盡聞其說景定甲  
子彗出平州草封事於家夫人侍側進曰從父當辭位  
久矣平舟嘆曰汝曷不為男子生我家耶及歸虞氏以  
家庭所親得者教其子公資質之粹學識之正豈獨得  
之父兄師友而已公在成均思正化本以儆士習上丁

監禮殿上伴讀劉生被酒失儀公命扶之出明日聲其  
罪削之貴近有為生謝過者公持不可蒙古生歛者傳  
仁皇東宮諭旨姑薄其罰公以吏牘列生罪狀咨詹事  
院以啟仁皇更是公所為由是益知公賢踐祚後以中  
書平章李道復領胄監事公與李公議歲貢法謂舊法  
以制祿立程誘諸生以進學如是則雖勉弗善請於衆  
中擇靜重有識嘗試以事者歲薦二人上親擢而用之  
以為勸李公亟言於上行之會李公去位不果已而拜

臺臣為祭酒召四方名儒為司業銳然有責成之志公與同列講求以副上意有好為異同者撓之司業投劾去公亦以病免諸生之賢者卒業私塾居數歲不絕其在集賢上議極陳學校之弊其畧曰師道立則善人多學校者士所受教以至於成德達才者也今天下學官猥以資叙強加諸生之上名之曰師有司弗信之諸生亦弗信之於學校無益也如此而望斯道之立可乎偏州下邑之士無所見聞父兄遣子弟入學初無必為學

問之意師友之從游亦莫辨其邪正然則所謂賢才者  
非天降地出有可望之理哉今既莫若求經明行修之  
成德者身師尊之求以至誠庶幾德化之及斯民有所  
觀感其次則求操履之近古而不為詭異者經義守正  
說而不尚奇論者為衆推服而非鄉愿者延致之使教  
學者他日當有所發也又其次則取鄉貢之退者其議  
論文藝猶賢於汎汎莫知根柢者也朝廷聽其論而憚  
改作初考會試議曰國家科目之法諸經傳註合有所

主將以一道德同風俗者非使學者專門擅業如近代五經學究之固陋也聖經深遠恐非一人之見可盡試藝之人惟其高者取之不必先有主意使求賢之意狹而差自此始也又嘗經筵講罷上言東南海運勞險因謂京師瀕海以東至於遼碣皆萑葦之地潮汐日至淤為沃壤宜用吳人圩田法築隄捍水為田募富民欲得官者合其衆請耕官授以地而定其畔能以萬夫耕者授以萬夫之田版萬夫長千夫百夫亦如之三年而視



成情者易之勤者物地力之高下定額於有司以漸而  
征之五年有積蓄真授以命就其儲給之祿十年然後  
佩以符信如軍官法世襲之庶可寬東南歲餉之役可  
得民丁數萬衛京師制島夷又因使富民役仕之志遂  
而江海求食民有所歸凶歲不至為盜今海口萬戶之  
立願宗其說而未盡用其法云關中大饑公建言大災  
之後土曠民稀可因之以行田制擇一二有仁術知民  
事者為牧守寬其禁令使得有為因舊民所在定城郭

間里治溝洫畝畝之法招其流亡勸以樹藝數年之間  
復其田租力役春耕秋斂量有所助久之遠者漸歸封  
域漸正友望相濟風俗日成法度日備則三代遺規將  
復見於虛空之野矣天子稱善羣臣未有相其謀者太  
史院教授雒陽楊茂先知造律候氣之法試用於郭太  
史有徵晚合律厯為一書謀以進而患其辭煩簡失當  
知公研究是學屬潤色之公慨然整治其書且告當道  
冀其見用茂先病死不見進今藏太史齊伯高家皇朝

經世大典之為書公任其勞居多其目則周禮之六典其制則近代之會要其事則今樞密院御史臺六部總治中外百有司之事務而其牘藏於故府者不足則采四方之來上者叅之祖宗之成憲功臣之闕閱具存凡八百帙既進謂同列曰他日國史諸志表傳舉此措彼耳考公制作之志使究所長其為聖治裨益能使一代之風軌藹然先王之遺烈焉則其事業豈下於先世兩公之在唐宋哉仁皇末年謂近臣曰今儒者盡用惟虞

伯生未顯擢耳俄晏駕而止英皇既居儲宮議寶冊禮  
有司講前代典故無所於考輟忠憲王拜住在太常雅  
器重公亟召公入議公曰世祖初年即命裕皇東宮後  
授玉冊金寶詔告萬方此我朝典章也何以前代為王  
以公言入奏上大說輒行之及相英皇力薦公可大用  
時居憂方省墓姑蘇遣使求之江西不得求之蜀又不  
得比返命而事變作晉邸御講筵見公氣貌溫和不敷對  
剴切賜中統楮幣五十錠令上皇帝召公不至時賜臣

下碑銘則諭旨於家撰述公侍延英閣求去者屢因言  
陝西田制得俞旨徐進曰願假臣一郡試以此法行之  
左右曰虞伯生託此為歸計耳曲阜新廟成求使代祀  
允而復寢面請補外則諭旨若曰卿才何所不堪顧令  
未可去耳中丞趙伯寧乘間為之請怒曰一虞伯生汝  
輩不能容耶閣中日承顧問或應制作文皆寓規諫或  
遇事諫止出不語人諫弗能止歸家悒悒數日家人察  
知之不能詰其故也為讀卷官擬進士策問二篇做中

庸九經之目問所以宜於今之道次篇問九聖之學上  
覽嘉歎用其次篇一日受命草一勲舊封王制詞於內  
庭同列二人嘗為上所親信者密謂公曰上意姑與國  
公公如其言有頃丞相來自榻前趣進草甚遽公以草  
視之愕然公悟同列給已亟易其詞以進終無所言又  
一日受命記一古寺稍陳前代遺蹟有構飾於上者謂  
公前代相臣子孫適美前事爾他日入見上以是語之  
對曰前代已遠臣庶子孫思其父祖固不忘其所事此

可為忠孝臣愚不足以及此但臣以疎庸遭遇聖代致位通顯他日臣之子孫以臣遭遇世世毋忘本朝厚恩亦忠孝之勸也故臣謂能為此言於上前者亦必忠孝之人也上目近臣歎異之公坦易質直揚摧人品質正文字臧否惟是之從無所顧忌故朝論屢以御史才薦之然亦以是賈怨動以危事中之賴人主察其無他以免惟篤孝友少與嘉魚令共學於家父子兄弟自為知己人以擬眉山三蘇嘉魚歿撫其孤遺如己子孟兄秉

以莞庫解送官物至京道途折閱直數千緡公悉代償  
無難色遇庶弟棐及其孤妹皆盡恩禮常以祿養不及  
其親遇珍膳不敢盡器盛暑不命童子揮扇曰勞人以  
佚已君子不為也生平知己大臣藁城董宣公保定張  
蔡公隴西趙魯公皆國元老趙之復相當面請召柳城  
姚公涿郡盧公廣平程公吳興趙公每與公論文輒以  
方來文柄屬之當世文士嘗經論薦後皆知名諸公受  
業為所推許今多公輔之器不可悉數公之為學非託



空言每言先王建事立功必本於天理民情之實故教  
學者務欲貫事理於一致同雅俗於至情以是為圖治  
之本其於經則曰易之為書首尾完具於三聖人之手  
生乎千載之下仰觀千載之上以凡下之資而欲窺見  
天與聖人之道不可下此而他求也得江東謝君直之  
說以先天八卦圖為河圖九數而九位者為洛書十數  
而五位者為五位相得之圖心雅善之或請著說則辭  
曰易道廣大苟得其自然之數何往不合先儒有成言

焉存以俟知者於禮則曰學知先務莫切是經惟二戴  
雜以後人所記變禮不可盡信其餘則二帝三王之遺  
文天子諸侯大夫士之成制粲然可考不可以淺近言  
也屢欲通古今為一書以為後來考禮之助以官業不  
克就濂洛新安諸君子之書就其所存以極其至而慨  
夫吾黨之士知之者微矣於吳氏書亦然二氏之學往  
往窮其指歸即其徒叩其負挾有所見則為之太息曰  
學者不能潛心聖人之微言以明下學上達之要而欲

切究性命之源死生之說其能不引而歸之者難矣其  
為文自其外而觀之汪洋澹泊不見涯涘刺乎其中深  
靚簡潔廉劇俱泯造乎混成與四明袁公伯長清河元  
公復初友厚二人有著作必即公論之元初謂公文無  
雷霆之震驚鬼神之靈異將何以稱於世公謝曰誠不  
能也晚乃大服其言至大延祐以來詔告冊文四方碑  
板多出乎手其撰次論建與其陶冶性情黼藻庶品之  
作襍之古名賢之編卓然自成一家言客未嘗見其學

書篆隸行楷題榜下筆便覺超詣以書名於世者憚之少讀邵子書領悟其妙題其室曰邵菴學者因號之曰邵菴先生然廷陞都俞朝野稱謂率多以字行其存藁自題曰道園學古錄門人彙而鈐之得應制十二卷在朝二十四卷歸田三十六卷方外八卷其散逸尚多閒居雖久歸美報上之心仁民澤物之志未嘗一日忘之邑有平糶倉田淪於方外力言於當道復之邑大夫陳有容率同志作邵菴書院迎公講道其中以惠學子公

欣然諾之落成而公薨在法公當進爵賜諡既葬而命  
未下立於公有奕世之契最先受知叅政公博士之召  
公實薦之朝同朝十年獎借非一故於是銘雖重於作  
而不敢辭銘曰

吁嗟先生衡山之高岷江之長磅礴深廣何可量也山  
英川靈合為天章變化倏忽何可常也君子用世斯文  
耿光鳳凰鳴矣于朝陽也善人云亡士氣弗昌鵲鳩先  
鳴百草為之不芳也王良善御騏驥上驤孰能寘之周

行也范冠蟬綏蠶績蟹筐孰能措之範防也載彼營魄  
返乎混茫朱鳥之舍離明之鄉也於繁遺文布護四方  
琬琰之刻名山之藏也吁嗟先生古有先哲兮知德知  
言知德不易知言尤難先生繼作兮誰謂九京九京可  
作兮百世弗諼大化幽然兮孰控孰搏芝草三秀醴泉  
有源天將以斯文兮厚公之子孫

碑文

曲阜重修宣聖廟碑

今上皇帝臨御之七年歲在己卯春三月戊辰御史大夫臣伯勒濟爾布哈臣托克托御史中丞臣達實特穆爾臣約治書侍御史臣鏞等奏監察御史言天歷二年十月文宗皇帝在御奎章閣學士院臣奏曲阜宣聖廟自漢唐宋金凡有隳廢必奉勅繕脩功成則勒之石衍聖公以舊廟將壞飾書奉圖屬學士院以聞時文宗覽圖諭旨省臣趣脩之事竣則立碑以詔方來今新廟既落而成績未紀懼無以稱塞先詔御史章上臣等僉議請勅

翰林侍講學士臣玄為文奎章閣學士院臣庫庫為書  
侍御史臣起巖為篆以臺儲中統楮幣二萬五千緡為  
立石之貲制皆允傳勅臣玄俾序其事玄拜手稽首言  
曰天佑下民作之君作之師昔者伏羲神農黃帝堯舜  
禹湯文武數聖人者作君師之道備於一人用能左右  
上帝克綏厥猷吾夫子出天獨俾以斯道凡天叙天秩  
天命天討之事夫子明禮樂刪詩書贊易道脩春秋而  
品節之以為百王法於後世儀封人曰天將以夫子為



木鐸子貢曰固天縱之將聖夫子自論斯文之任上以屬於天下以屬於已使得位設教即前數聖人所為繼天立極者也是故天欲興一代之治則吾夫子之道必大昭明於時歷千萬世如出一轍皇元龍興朔方太祖皇帝聖知天授經營四方太宗皇帝平金初年歲在丁酉首詔孔元措襲封衍聖公復孔顏孟三世子孫世世無所與增給廟戶皆復其家是歲厯日銀諸路以其半東平以其全給脩宣聖廟尋詔括金之禮樂官師及前

代典冊辭章鐘磬等器遣官分道程試儒業世祖皇帝  
初在藩邸多士景從比其即位大召名儒闢廣庠序命  
御史臺勸勵校官大司農興舉社學建國子監學以訓  
誨胄子興文署以板行海內書籍立提學教授以主領  
外路儒生宿衛子弟咸遣入學弼輔大臣居多俊乂內  
廷獻納能明夫子之道者言必稱旨  
在位三十五年之  
間取士之法興學之條討論之規裨益遠矣裕宗皇帝  
時在東宮贊成崇儒之美成宗皇帝克繩祖武銳意文

治詔曰夫子之道垂憲萬世有國家者所當崇奉既而  
作新國學增廣學宮數百區胄監教養之法始備武宗  
皇帝燭典制作加號孔子為大成至聖文宣王遣使祠  
以太牢仁宗皇帝述世祖之事弘列聖之規尊五經黜  
百家以造天下士我朝用儒於斯為盛英宗皇帝鋪張  
鉅麗廓開彌文明宗皇帝凝情經史愛禮儒士文宗皇  
帝緝熙聖學加號宣聖皇考為啟聖王皇妣為啟聖王  
夫人改衍聖公三品印章歸山東鹽運司歲課及江西

江浙兩省學田歲入中統楮幣三十一萬四千緡俾濟  
寧路以脩曲阜廟庭文宗賓天太皇太后有旨董其成  
功令上皇帝入纂丕圖儒學之詔方頒闕里之後鼎盛  
山東憲司洎濟南總管蒞事共恪以元統二年四月十  
一日鳩工至元二年十月初吉落成宮室之壯以寧神  
棲樓閣之崇以度寶訓周垣繚廡重門層觀丹碧黝塋  
制侔王居申命詞臣揚厲丕績於是內聖外王之道君  
治師教之誼大備於今時猗歟盛哉皇元有國百餘年

以來繕脩宣聖廟再丁酉之初以開同文之運天厯之  
際以彰承平之風東冒扶桑西踰崑崙南盡火維北際  
冰天聖道王化廣大悠久相為無窮治本實在茲矣有  
詔御史臣思立奉祝幣牲齊馳驛往祭臣竑既叙顛末  
請系以詩詞曰厥初生民倥侗顛蒙三五既作大道為  
公風氣日開民俗日漓道統絕續孰綱孰維少昊之墟  
東魯之土誕生聖人以淑萬古聖人以生代天以言立  
我民極與天並存維皇建極尊用其道百王軌範於以

順考三光以全寒暑以平俊民用彰時乃迂衡天子垂拱大臣承弼體信達順鳳麟時出皇元之興厚集大命太宗興文首法孔聖世祖龍飛多士屬心恢弘文治濬發德音世及三紀仁漸義摩建學立師善人用多裕宗溫文祇荷詒燕成廟崇儒迪若天顯武皇英毅入繼離明載崇徽號玉振金聲濬指仁皇文德繼世誕揚祖訓籲俊尊帝爰及英宗禮樂孔殷穆穆明考蓄德懿文文宗繼緒聖聖克肖乃開奎府廼飾孔廟今上嗣位丕式

大猷勒石新廟宏賁洪庥新廟奕奕泰山具瞻衡統絃  
綖袞裳衣襜維宋維金遺刻具在於赫我元冠冕百代  
我元聲教極被堪輿費舍萬里誦詩讀書維茲曲阜斯  
道之壺如水有源如木有本皇鑒在上執我道樞相我  
熙朝躋民唐虞睠言臺臣職是風紀昭宣獻謨實用歸  
美聖道王化如日麗天儒臣詠歌億載萬年

江陵王新廟碑

大元至正七年某月制故湖廣等處行中書省左丞相

贈佐平南紀宣力功臣太師開府儀同三司上柱國追  
封楚國公謚武定阿爾哈雅改贈宣威服遠輔德翊運  
功臣進爵江陵王官職勲謚如初制下王之諸孫以舊  
廟在天臨郡治之義和坊者禱於閼闔廟貌弗肅徙於  
故第之側作正廟七間中肖王像後堂稱是別作神主  
父祖子孫咸列於位歲遇王之忌日祭像前廟時祭嘗  
燕設主後室鐫俎籩豆壹遵古遺廟之門廡垣墻崇大  
厥制克稱封爵享祀之庖齋宿之舍祭畢飲福之所各



有序置經始於六年之秋落成於是年之冬曾孫慈利  
監郡阿爾斯蘭哈雅至劉上謁玄記之惟王建國為國家  
表功之極榮子孫旌德之盛典具載國史玄請舉其華  
華大者揭而書之麗牲之石庶幾觀者知王之功在社  
稷德在人心所為不朽者實在於茲玄博觀天下大勢  
古今以江陵平江南者四代焉未有不先得荊州而能  
得天下者晉以王濬益州舟師下江陵而吳降隋因宇  
文氏先取蕭詧江陵之北用以圖陳而陳亡趙藝祖即

位之初卽命慕容釗將兵假道以伐湖南延釗至江陵  
襲降高繼冲由岳趨湖南周保權平然後東舉闕越西  
舉巴蜀南唐稱臣我世祖皇帝征宋既渡江阿爾哈雅  
以偏師搗江陵既而拔之由是進兵遡洞庭薄長河遂  
平湖湘聲震南海丞相巴延以大兵順流而東徇吳越  
傳臨安宋主納款故今之善言兵者謂王先取江陵其  
功不在巴延下向使江陵未附是時東蜀猶宋地也萬  
一宋人合荆蜀之兵以闕江漢雖勝負素定然豈萬全

之策哉王下江陵降高逵捷書至上為之大燕三日手  
書以勞王誠以荊州定則東南之勢定矣厥後王建省  
湖湘分兵嶺嶠恩威並翔悉有其地宋太師既燔其孤  
臣謀立兩辱王於閩海文天祥亦舉兵江西湖南廣右  
王承制署吏勞來既久人心已安勢難動搖尋自覆敗  
故令善論功者謂王於斯時綏定湖廣視先取江陵之  
功亦未易以高下論也抑玄嘗聞長沙先輩縉紳大夫  
言王初圍潭州守臣李芾嬰城固守者三月餘芾死力

盡諸將乃開門入我師同列兩叅政怒其後降欲屠其城王持不可兩叅政不從遣使入奏王亦遣使附奏於上皇曰臣初徂征受命陛下首以曹彬下江南不殺人為訓今潭州城已降同列疾其拒命之久欲獮其民臣誠不敢負陛下先詔昧死為民請命叅政使偶先至京半月上詢知不自王所來疑之未即召見有項王使至亟召入內得王奏大喜曰阿爾哈雅言與朕志正合乃召叅政使入切責之若曰國家征南非貪其國欲使吾

德化均及其民人爾今得土地而空其城政復何為汝  
不稟命主將輒為異同當正汝罪以汝薄勞令姑貫汝  
後復敢爾必寘汝法其從阿爾哈雅慰安吾民毋或異  
議使者往復十有四日奏下王布宣德音城中官民士  
庶道俗男女貴賤長穉亡慮百萬游魚在釜寄命頃刻  
賴王一言易骨而肉由是列城聞風歸附相望未及暮  
年南盡八桂冒于南隅悉歸職方王之威惠其盛矣哉  
夫天之為德莫大於好生聖人一天下之道莫先於不

嗜殺用兵之不祥莫大於殺降殺降之慘尤莫盛於屠城將家一念之烈流毒數世其後嗣盛衰之報百不失一豈獨曹彬曹翰為有徵也王之子孫多賢文武才器代有聞人天之報亦昭昭矣雖然國家先定臨安後平淮東今追爵巴延淮安王表武功之所終先定江陵次平臨安追封王以江陵之地表武功之所始歟二王之論定天下混一七十餘年矣王家世北庭阿爾哈雅其小字也及貴以小字行其世系之詳見故翰林學士承

旨姚文公燧神道碑銘立既述功德之大者以遺後人  
復作迎送神詞日出師四方訓以不殺惟江陵王受命  
徂征卷甲西南荊州底平揚旗洞庭和風鳴條駐軍長  
沙以逸制勞湘人籲降王實活之三軍不刃王實遏之  
土田第宅賜在湘野僮客千億是畊是稼奕奕新廟于  
湘之堦犧牲粢盛歲取湘沅朱弓金鎧新廟是藏鐘鼓  
豐蔀牲肥酒香王徠徐徐旗旄獵獵湘靈嶽祇惟是震  
疊王降庭止有蕃膺祉繩繩曾孫以享以祀曾孫繩繩

自雲徂仍江漢同流汝功匹休皇家百世吾王不留言  
從世皇世皇遐征曠矚八荒乃睠南顧維此荊州曰汝  
之功荊州汝功朕世服膺今我嗣皇王汝江陵王拜稽  
首曰憑天威神美天授荊人來歸洞庭泱泱湘水是滙  
王有曾孫廟祭來會國利利忠家利利孝忠有旂常孝  
有廟貌王來風雨王去日星焄蒿昭明曾孫以寧廟貌  
弘敬曾孫衆多挽留莫從屢舞以歌有朱斯靡有雕斯  
組工歌泂泂福祿來祐載奉雕俎載闔朱扉萬有千祀



王無我遺

洞淵閣碑

太極判二氣分陰陽各究其變後天設六子陳雷風獨彰其烈陰陽究其變而數行理氣之中雷風彰其烈而神寓造化之表迨夫世別醇醜位殊幽顯札瘥水旱若有握其柄者矣生殺予奪若有尸其職者矣道也者範圍乎兩儀法也者檢押乎品彙由是保制阨運道稱主宰攘除凶妖法入機用考夫漢儒列五時之名而祠禱

盛周官書十日之號而符呪興司厲有秩而祭于國祔  
疫有典而儻於鄉其所由來不既遠乎斯則洞淵之閣  
作於石晉之年端有自矣夫惟五季否塞羣黎憔悴時  
有神人拯世者出是殆旻天覆下之仁維伏魔三昧之  
尊寶神宵九帝之一以無為制動以不怒示威觀厥圖  
回漠然兆朕爰自黃冠道士肇跡天成青衣道童接武  
淳化歲歷四百功施億兆稽諸郡誌酌以輿誦禦民大  
陵之患已民雩壇之嗟感應捷於鼓桴枉直明於槐棘

至若樹降魔之幢于雲間得斬鬼之符于地下殄氣以之而屏息靈文由是而宣朗繼道童而神效者有大夫曰章氏焉初三層之神居表一郡之傑觀雖炊隣寇具存遺規里人評事彭梅叟獨割已貲追還舊貫驅五丁之力以鑿石掄百尺之材以荷棟揭洞淵於絕頂用縱凡目顏寥陽於上層繼曰聖境中標諸天冠寶閣之稱下扁朝元著璇題之會竊陽肖像七御儼如天宮伏魔專俟諸天列叙帝馭朝元距地而稍遙飛仙齊班而上

超直北面勢題極高明綺䟽透乎初日藻繪留乎行雲  
閣後崇墳其名虛皇贊府歐陽確旌表彭知微哀衆力  
之所作也墳後累榭以奉三寶居士周繼祖李必興踵  
義士之所為也三棟中達兩廂傍峙左挾之屋重上懸  
鐘千斤右挾之屋如之鳴鼓百里左廡則薰南鐺崇勛  
作天師閣右廡則潭東劉龍祥作三官閣東為延真觀  
舊主洞淵新有玄帝北坡彭仁叟之所創其神遷自壬  
癸福地者也北為鳳林橋上引鈴岡下通青原茂林楊

學周之所建其意比擬河漢閣道者也神幣燎而不炊  
其爐曰光明藏神泉引而無害其井曰清淨源每歲上  
元設齋半月金碧炫轉於西東琉璃晃耀乎表裏張燈  
如漢太乙蹤跡通宵而可行題榜若魏凌雲鬚髮望空  
而欲白刼利兇率彼皆鋪張華林鬱羅孰得遊覽故夫  
地位之高有若茲閣神人之好信在於樓乎而况發武  
功過孤川山脉鍾其秀矣導攸輿匯盧洞江流蓄其靈  
矣城濠通龍湫之穴郡市布蜂房之居要之地固以仙

而名境亦資人而勝鍊師雲牕周孔鼎靜嘿蕭宣德西  
叟李應康玄門之梁杞羽幘之冠弁品登真錄功播珠  
庭者也守約曾從龍省齋歐陽慶祥翠峰彭大同坦菴  
施端履斯立曾廷暉靜學劉孔彰矮牕蕭惠通無為王  
雷發洎夫桂林可心之劉曰元亨曰道弘環中潞川之  
彭曰克恭曰道明塵外之曾曰貴寬適吾之劉曰益新  
皆宗證之幹蠱冲侶之哀謙能使丹芝之茹有圃青精  
之飯有田扇離坎而液祥金起般輪而獻神伎然後聲

鏗律呂之和器備天人之供者也貴寬幼從先人來數  
真館及長離俗之志勇提身之律嚴佩混元之祕章茹  
抱黃之梵炁撫訶而百靈集禁禱而諸福臻為茲山而  
徵辭壽斯道於來裔真其人也與嗟夫赤明延康坐更  
歷劫勾芒玄冥迭御四時洪惟皇元昭授神策歲宗羣  
望代闡釐事切意洞淵之於明時正猶希夷之於衆物  
人見主張之功若無事者孰知輔翼之惠又振德之乎  
雖然商顏邇德人之居當疵癘之年亦獲免是華封居

放勛之世含富壽之祝則何以哉載揚洪庥請志善頌  
銘曰粵若邃古太和磅礴柔剛相乘饒乏紛錯情滋偽  
生氣羸瘠作道惟虛集庶物索倫神絲精聚九圍郭郭  
閔晉非据烝黎罔託煜處江沱晝火其爝軫野邁災帝  
衷是愕維時洞淵受命碧落相爾黃冠抽我玄鑰薊氛  
彗歟襖穢括惡道心剗螟善氣辟蠹三樟巢鳳孤笛舞  
鶴爰歟冲遊誕龜宮閣琪樹層柯金枝重夢翔升華拱  
疊攬朱構飛廉霄騫天祿雲蹠赫曦雕櫳鮮焱虛箔帝



真燕娛營衛掉擢區旌吳回函琛海若祝融灌烽蓐收  
噤據年降屢康歲興長樂士勤竹素農力錢鑄商通車  
輦工世槩雋征行靡占疾疫勿藥皇風載熙大道斯廓  
罔俾仁聖職憂民瘼神之格思萬壽攸酢

曾塵外鍊師來求洞淵閣碑惜予久病不能親書煩  
致意青城揚奉禮為余雙樞筆作漢隸書之歲久當  
與韓擇木桐柏觀記爭先進而方駕漢魏可也如字  
多碑窄可做張長史郎官石用小楷書之青城皆足

辨此故以相屬也

元封祕書少監累贈中奉大夫河南江北等處  
行省參知政事護軍追封齊郡公張公先世碑  
皇元勅有中原樹建侯伯經營四方濟南張氏得國於  
齊在東諸侯中脩臣職甚謹權府歷城張公受命我元  
為齊陪臣父子相承屢攝齊政內治新政外禦強隣彌  
縫周旋使齊事我元甚忠故張公有功齊人甚大世祖  
罷侯歷城子孫仕於天朝仁宗繼述祖訓開科取士延

祐甲寅有臣起巖首貢於齊明年乙卯大廷策士擢第  
一人實歷城張公曾孫多士偉之父中祕書齊公範碩  
德高年生受顯爵及其即世子仕日崇贈典日厚令皇  
上纘緒起巖列官中書參崇國議尋進二品父範贈河  
南江北等處行中書省參知政事追封齊郡公推及大  
父贈封有差至元二年三月十日上御厚載門奎章大  
學士臣錫喇卜從言於上曰侍講學士起巖服勞累朝  
恩賚先世將為碑銘垂諸久遠其勅翰林直學士臣玄

製文奎章閣學士庫庫書丹奎章閣承制學士師簡篆  
其碑首以賜上允其言於是臣玄承詔討論張氏本章  
丘人遠祖逸避兵難贅禹城吳氏家生三子曰某季曰  
寅娶高寅二子長曰敬宗娶燕三子長曰道娶李一子  
曰迪字吉甫是為懷遠公實權府府君之父中秘書齊  
公之曾大父也姿貌偉傑膂力絕倫臂撐石獅子起行  
戲與里中少年角無敢嬰者狂競無賴遇輒以力伏而  
拱之善騎射能兼控二强弩綰弦著指連彀俱滿軀幹

才力中募版本軍三翼都總領金人南遷寓迹農業齊國張忠襄公行尚書省濟南招致帳下用戰功遷濟南兵馬鈐轄城中更兵燹公私廨舍盡燬忠襄命權府事公繕郭郭建府治畫閭里招流亡駸復舊觀時有隣寇晝旂夕柝斥堠明肅衆賴無恐行省自水砦還治拜懷遠大將軍元帥右監軍濟南府推官佩黃金虎符仍提領歷城縣事忠襄南征存命留後公蒞政廉平號稱良吏兵後民稀城內外多閒田召民占射墾為永業已獨

無取事平從民買田城北浹河生平治產不求豐腴纔足即已嘗曰吾祿足以給衣食居足以避風雨安用怙勢殖私以為子孫累為吾志玷耶娶李追封齊郡夫人一子福字顯祖是為權府君府君雄健有父之風尤孝敬好學讀春秋左氏傳貞觀政要能背誦年十九嘗重午日與諸將馳射柳閱武堂下一發命中身手驍捷忠裏賞補列校歲庚寅從朝和琳預議伐金從取邳圍沛食盡其將率敢死士夜斫營謀突圍出府君力戰却

之退擊剽其壘而還詰朝沛陷給白金符為中書奏差  
從攻宋蘄黃有功縣官增諸路兵濟南調二千三百人  
齊人繹騷奉省命謁於上曰兵興民疲役無虛歲今又  
增兵物情易駭盍寢其命以安危疑數對詳懇上大悅  
從之准舊制丁二十人調一餘罷不行得旨駢還所過  
宣上德懽聲如雷擢濟南軍民鎮撫都彈壓行中書省  
伊囉幹齊建議常征外增銀六兩視絲綿中分折輸嗣  
侯宣惠公將遣使入奏而難其人府君請行至白藩王

曰新邑民已定正賦今又增額將不堪命王以聞命遂  
罷遷兵馬鈐轄府事從宣惠私覲面陳上前乞休兵息  
民以養其力上嘉納之侯解玄貂玉帶以旌其忠侯薨  
即藩王所奉子宏朝和琳宏嗣國是為武靖公府君歸  
力請致仕進諸子曰吾輔齊國三世朝會征伐未嘗不  
從今五十有六其歸休之時乎年七十一終居家處官  
教子人取以為法娶楊氏鎮國上將軍左副元帥通女  
弟有淑德孝行追封齊郡夫人五子中子鑄山字宣卿



一字仲宣號黃臺野客是為天官齊侯英邁豪爽幼負  
奇節讀書通大義交友重然諾布衣以大任自期古人  
自勗出中庸大學授諸子曰爾曹熟此宰相可能也天  
官嘗宰歷城讓其丞段而已丞之祿入均惠族鄙而日  
與賓客擊鮮為高會每傾已貲人已匱不悔人負不尤  
至元官制行遷官臺監場管勾辭不赴改博州錄事判  
官轉陞東昌仍其任居官介然官滿赴調常嚮產治裝  
逆旅雖至乏絕人或周之非義不取能工書得黃鵠章

米襄陽筆法至元癸未十月十八日卒薊南城年四十  
九以孫貴初贈中順大夫禮部侍郎上騎都尉追封齊  
郡侯娶安氏山東行省左右司郎中圭之女累封齊郡  
夫人二子長範次高蚤卒三女長適翟氏夫亡貞節次  
適宋某次適侯瓚範字議甫號孟齋是為中祕書蚤穎  
悟長博學強記先侯守官清約家無宿儲公深自貶損  
贏以為養及厝墓如禮嘗寓平原德平鎮因古堤架屋  
為童蒙師或踰旬時不出門人號不下堤先生性不事

華靡篤學信道尊聞行知善善不倦惡惡不避學者擬  
諸古人歷仕維州學正寧海左翊侍衛教授除四川等  
處副提舉子貴封集賢待制奉議大夫驍騎尉歷城縣  
子加封朝列大夫祕書少監驍騎都尉齊郡伯天歷戊  
辰正月二十七日就養京師卒年七十有七贈翰林直  
學士亞中大夫輕車都尉追封齊郡侯加贈中大夫河  
南江西等處行中書省叅知政事護軍追封齊郡公公  
善吟詠富著述有蓬牕藁益齋旅齋二集能大小篆隸

行楷皆遒勁有體娶丘氏先卒再娶薛並封齊郡夫人  
二子長起巖薛氏所出初授集賢脩撰遷國子博士監  
丞司業歷翰林待制監察御史中書右司員外郎郎中  
兼經筵官轉太子左贊善燕王司馬拜禮部尚書參議  
中書省事陞翰林侍講學士中奉大夫知制誥同脩國  
史尋以本官知經筵事出為江南浙西道肅政廉訪使  
未行奏留侍講進知經筵俄除陝西諸道行御史臺侍  
御史娶某氏封齊郡夫人次如古國子伴讀大司農掾

娶某氏孫男二順孫堅孫女一初玄登第出起巖榜下同朝十年入翰林為僚友齊公之墓玄為之誌先玄父渤海侯蒙恩賜碑上勅起巖故玄聞命不敢以固陋辭惟張姓之始軒轅子青陽之子揮觀乾文制弓矢因得姓濟南忠襄爰聚厯城姓同一初始奮以武終顯以文君臣相須蕃屏王室後先封齊豈偶然者懷遠公賁育之勇至於治國仁如鄭僑廉如晏嬰撫民乳雛如療飢渴權府府君生而忠孝資備文武盡瘁所事勤施於民

旂常司勲伏臘里社殆未為過齊侯志崇心庫尚友往  
拈齊公真脩實踐蔚為醇儒四世功德積久發閎宜厥  
後人出際熙世裒然掄魁為國羽儀迨其立朝凜有風  
節舒徐進退求福不回豈非先世嘗有豪傑偉人稟賦  
敦龐未究厥蘊氣鍾子孫才器深茂福澤與俱我國家  
因以得名世之士哉抑功及民者未食其報造物以遺  
其子孫哉推其所自是宜為銘銘曰自古有國文武迭  
張顯允厯城齊姓之將代有鼎士奮於齊疆經緯文武

與世相當國初戡定歷城父子有力如虎世為齊卿攝  
治其府區宅畷田民奠環堵既輯其民又禦其侮夫優  
維何民訖可休有增乘賦是克是培夕馳我馬朝告厥  
猷天子曰嘻予嘉汝謀為是暴斂我民何郵欽哉爾往  
獻納是壽命爾勗爾侯度是脩爾田勿萊爾政勿苛農  
弛勞於野士畜銳於家時維張公惠齊孔多齊轄日膏  
齊廩日盈張氏獨貧三世筆耕豈善治國而不知治兵  
有遯黃臺有敷德平蓄德陳陳發聲旬旬宜侯宜公庶

其哀榮累洽重熙時尚維文有偉國彥積文策勲奏篇  
大廷上曰不羣繩武乃祖蓋忠我君出敷王言入贊聖  
謨踐敷政塗匪臺伊閤德容溫溫良玉善琢維仁騶虞  
惟瑞鷟鷟上勅詞臣考德諏義錫朕寵命誅其先世有  
貞斯珉有亢斯竈亶其揚休式勸有位

元贈效忠宣力功臣太傅開府儀同三司上柱  
國追封趙國公謚忠靖瑪哈穆特實克碑

國家彌文百度惟貞納民軌範垂則永世於是羣公先



正先朝臣隣數陳申命賜誅昭天漏泉罔不承休元統  
二年九月壬子中書平章政事臣薩迪臣克埒濟蘇等  
言於上曰戶部尚書臣和塔拉實克乃祖伊克德勒乃父  
瑪哈穆特實克事我世祖皇帝懋建嘉績仁廟在御並贈太  
傅封趙國公今將為碑其勅翰林直學士臣玄製文侍  
講學士臣起巖篆額戶部員外郎臣楊益為書以賜制  
可臣玄受命退聞故府得故學士楠行詞及和塔拉實克  
具事狀來乃叙而銘之思昔先王辨方正位體國經野

必有多才藝之臣共成厥功爰及後主繼體守文亦必有世爵祿之臣共享其利有虞共工之官成周宮闈之守後世子孫著以為氏其可徵也考功記曰國有六職百工居其一國詩定之方中之傳大夫有九能第一曰建邦命龜夫六職者王公論道大夫立政在焉九能者使臣造命師旅擔衆次焉以是知審曲面勢之為職揆日作室之為能方是數者厥用大矣我元造邦臣伊克德勒瑪哈穆特實克功居六職之一才擅九能之先贊

體國之謀濟世官之美是碑為宜按伊克德勒系出西域唐為大食國人世祖居潛已見親任己未南征還幸其第伊克德勒聞乘輿至衣地金纒以藉馬蹄尋裂金纒分惠從官上深納其勤款庚申即祚命董察卜達爾局凡潛邸民匠隸是局者悉以屬之察卜達爾云者國言廬帳之名也是年九月錫金虎符護以璽書至元三年定都於燕八月授嘉議大夫佩已賜虎符領察卜達爾局諸色人匠總管府達魯噶齊兼領監宮殿時方用兵江南

金甲未息土木嗣興屬以大業甫定國勢方張宮室城  
邑非鉅麗宏深無以雄視八表伊克德勒受任勞勩夙  
夜不遑心講目算指授肱膺咸有成畫太史練日圭臬  
斯陳少府命匠冬卿掄材取貲地官賦力車騎教護屬  
功其麗不億魏闕端門正朝路寢便殿掖庭承明之署  
受釐之祠宿衛之舍衣食器御百執事臣之居以及池  
塘苑囿游觀之所崇樓阿閣縵廡飛簷具以法故役不  
屬民財不靡國慈足使衆惠足勞人功成落之貽賞稱

首歲十二月有旨命光祿大夫安肅張公柔工部尚書  
段天祐暨伊克德勒同行工部脩築宮城乃具畚鍤乃  
樹楨榦伐石運甃縮版覆簣兆人子來厥基阜崇厥址  
矩方其直引繩其堅凝金又大稱旨自是寵遇日隆而  
筋力老矣紀功太常攸效欽崇部人鑿石作像髭髯咸  
肖沒置墓舍族屬見之謂其非法謀棄隱處世祖夜夢  
伊克德勒若有愬事狀如生平明發召詰其家以像事  
告亟命止之賜楮幣萬緡作祭事子瑪哈穆特實克寶世

其任大駕時巡上京出狩近郊入門甫植幄帳預存風雨攸除燥濕具宜齊祭張次燕享設帝制作疊出等威以張物絕濫惡工極鎮緻亦既歷年小心匪解數被殊眷積階正議大夫遙授工部尚書領察卜達爾局諸色人匠總管府達魯噶齊以終四子長曰穆爾薩蚤世次曰茂巴爾斯以正議大夫領察卜達爾局仕至元貞授工部尚書次曰和塔拉實克由餘杭浦江監縣歷江南陝西兩臺監察御史轉漢中僉憲雲南行省都司入為戶部員


外郎內臺御史大都路同知出為南山淮泗兩憲副杭  
州為總管復入為大都路達魯噶齊再出為濟南總管  
三八為大興府尹十五遷為止議大夫戶部尚書次曰  
阿哩袞實克不仕孫烏瑪喇寔穆爾薩子當襲是官以幼  
乃用阿哩袞實克子穆爾薩繼領察卜達爾總管府達魯噶  
齊烏瑪喇既長授揚州織染局同提舉先世茂巴爾斯  
請于朝制贈伊克德勒效忠宣力功臣太傅開府儀同  
三司上柱國追封趙國公謚忠敏娶和塔拉額實封趙

國夫人贈瑪哈特穆實克推誠贊治功臣太傅開府儀同  
三司上柱國追封趙國公謚忠靖娶烏喇特呼圖克封  
趙國夫人至是和塔拉實克中外踐駁不失令譽有司厚  
往飾終施及祖禰厥有繇焉人臣盡忠所事信必有後  
玄惟考周官之法誦楚宮之詩執太史之簡為小史之  
誅有君命焉不辭卒塋歲月事在壙石不書二代共為  
一碑用漢薛君劉君故事銘曰西域有國大食故壤地  
產異珍戶饒良匠匠給將作以實內帑人用才諳邦周



攸與維忠敏公外諲中朗機警赴功敬慎事上私第翼  
翼南還駐仗軾我路馬地布美塲左右世祖羽翼雄創  
受命繕營廓智弘敞捷梯設梁九軌夷曠追木捷陶萬  
夫于往取鍛取屬于刻于礪有盈斯覺有閔斯抗皇皇  
紫宮民極環仰軒轅綴列鈎陳聯象黃龍負柱金爵栖  
榜六寢儷美百雉侔狀心諦問架目諧尋文手胼舛翰  
心瘁保障詒彼忠靖世筦廬帳旣施重雷馳挽百兩秦  
蓋封樹唐衣愧旆曷覩國制麗密無讓架燹相尋雲來

是做熙庸帝綽佩寵天獎業盛曷奕光流矜嚮穹碑啟  
道貞石詔像夢徵辰告秩冠寅亮睟文撫原綏貺謚壙  
雍都疇倣洛宅敦昉企蹤保爽婉績蕭相



圭齋文集卷九